

Nuashonrú maidir le Beartais EPSO le haghaidh iarrthóirí ban a bhfuil socrú/socruithe réasúnta á lorg acu i bpróisis roghnúcháin foirne a bhaineann le toircheas agus breith clainne

Cuspóir beartais

Tá EPSO tiomanta do luachanna an neamh-idirdhealaithe agus an chomhionannais deiseanna do gach iarrthóir. Dá bhrí sin, is é is aidhm don bheartas seo deimhin a dhéanamh de go bhféadfaidh iarrthóirí ban páirt a ghlacadh i bpróisis roghnúcháin foirne a eagraíonn EPSO, thar ceann institiúidí an Aontais Eorpaigh, ar bhonn comhionann le hiarrthóirí eile agus nach mbeidh siad faoi mhíbhuntáiste de bharr toirchis ná breith clainne.

Cúlra dlíthiúil

Tá EPSO faoi cheangal ag na forálacha ábhartha de dhlí an Aontais Eorpaigh a rialaíonn neamh-idirdhealú agus comhionannas deiseanna.

Is í an phríomhthagairt dhlíthiúil [Treoir 2006/54/CE an 5 Iúil 2006](#) maidir le cur chun feidhme phrionsabal an chomhionannais deiseanna agus na córa comhionainne idir fir agus mná i gcúrsaí fostaíochta agus gairme. Déanann an Treoir sin idirdhealú díreach nó indíreach a thoirmeasc ar fhoras inscne i réimse na rochtana ar fhostaíocht.

Leis an gcásdlí, cuirtear ceangal ar institiúidí an Aontais agus ar an gCúirt Ghinearálta, agus í ag gníomhú di ina ról breithiúnach, Treoir 2006/54/CE a chur san áireamh nuair a bhíonn siad ag déanamh cinneadh faoi shaincheisteanna a bhaineann le rochtain ar fhostaíocht laistigh de sheirbhís sibhialta an Aontais Eorpaigh.

Foráiltear le hAirteagal 2(2)(c) de Threoir 2006/54/CE go n-áirítear le hidirdhealú *‘aon chóireáil a fhágann nach gcaitear chomh fabhrach céanna le bean maidir le toircheas nó saoire mháithreachais de réir bhrí na Treorach 92/85/CEE¹’*.

Ina theannta sin, foráiltear le hAirteagal 14(1)(a) de Threoir 2006/54/CE go bhfuil toirmeasc ar idirdhealú i ndáil le *‘coinníollacha maidir le rochtain ar fhostaíocht [...], lena n-áirítear critéir roghnúcháin agus coinníollacha earcaíochta, is cuma cibé brainse gníomhaíochta atá i gceist agus ar gach leibhéal den ordlathas gairmiúil[...]’*.

I gcomhthéacs na nósanna imeachta roghnúcháin foirne atá i bhfeidhm faoi láthair, glacann iarrthóirí páirt i dtrialacha laistigh de thréimhse ama shonrach nó ar dhátaí sonracha, agus is é EPSO a shocraíonn na tréimhsí agus na hamanna sin.

Is féidir nach mbeidh iarrthóirí atá torrach in ann cloí leis na hamanna sin ar chúiseanna a bhaineann leis an toircheas nó leis an mbreith clainne. Sna cásanna sin, féadfaidh siad socrúithe réasúnta a iarraidh, rud is féidir le EPSO a chur ar fáil, i gcomhréir lena chuid dualgas maidir le comhionannas deiseanna agus neamh-idirdhealú.

Dá bhrí sin, tá cineál agus cur i bhfeidhm na mbeart socrúcháin sin sainithe sa bheartas sin.

¹ Treoir 92/85/CEE ón gComhairle an 19 Deireadh Fómhair 1992 maidir le bearta a thabhairt isteach arb é is aidhm dóibh feabhsúcháin a spreagadh ag an obair i dtaca le sábháilteacht agus sláinte oibrithe atá torrach agus oibrithe ar rugadh leanbh dóibh le déanaí nó a bhfuil leanbh ar a mbrollach acu.

Ráiteas beartais

Déanfaidh EPSO socrú/socruithe réasúnta d'iarrthóirí nach bhfuil in ann páirt a ghlacadh i dtrialacha ar dhátaí áirithe nó le linn tréimhsí áirithe ar chúiseanna a bhaineann le toircheas agus breith clainne. Ina theannta sin, féadfaidh EPSO socrú/socruithe réasúnta a dhéanamh do mháithreacha a bhfuil leanbh ar a mbrollach acu atá ag glacadh páirt sna trialacha roghnúcháin. Cuirfear an socrú/na socruithe réasúnta sin ar fáil d'iarrthóirí a chuirfidh EPSO ar an eolas faoin mbail atá orthu, de réir na dtéarmaí agus laistigh de na teorainneacha atá leagtha amach thíos.

Raon feidhme an chur i bhfeidhm

Beidh an beartas sin i bhfeidhm:

- maidir le hiarrthóirí atá torrach nó iarrthóirí ar rugadh leanbh dóibh le déanaí agus a chuirfidh EPSO ar an eolas faoin mbail atá orthu chun an socrú/na socruithe réasúnta atá ar fáil dóibh faoi na forálacha sin a éileamh
- sna próisis roghnúcháin foirne ar fad a eagraíonn EPSO agus ag gach céim den phróiseas.

Ba cheart d'iarrthóirí EPSO a chur ar an eolas faoin toircheas agus faoin dáta breithe atá tuartha nó faoin dáta breithe féin agus faoin láthair ag céim an iarratais, más iomchuí, nó, chomh luath agus is féidir sula mbeidh an triail shonrach EPSO le déanamh. Má chuirtear an t-eolas sin in iúl do EPSO go déanach, is féidir go gcuirfear isteach ar chumas EPSO socruithe a dhéanamh faoi na dálaí is fearr is féidir. Ní fhéadfaidh iarrthóirí an fhreagracht as gan socrú/socruithe a dhéanamh a chur ar EPSO murar iarr siad an socrú/na socruithe in am.

Cur chun feidhme

Féadfaidh iarrthóir socrú/socruithe a iarraidh faoin mbeartas seo mura mbeidh sí in ann páirt a ghlacadh i dtrial ar an dáta a thug EPSO di agus/nó ar an dáta a dhearbhaigh EPSO di mar:

- an dáta trialach i gceist, tagann sé laistigh de mhí amháin roimh dháta breithe tuartha leanbh an iarrthóra nó ina dhiaidh², agus níl an t-iarrthóir in ann cloí leis an am sin,
- tá ar an iarrthóir an leanbh nuabheirthe a bheith ar a brollach aici le linn na trialach.

Ina theannta sin, na hiarrthóirí a mbeidh leanbh ar a mbrollach acu tráth dhátaí trialacha roghnúcháin EPSO, is féidir leo socrú/socruithe réasúnta chuige sin a iarraidh le linn thréimhse na dtrialacha.

Ní mór deimhniú leighis a bheith ag gabháil le gach iarratas ar shocrú/shocruithe réasúnta.

D'fhéadfadh an socrú/na socruithe seo a leanas a bheith i gceist d'iarrthóirí a dhéanfaidh a dtrialacha go cianda:

- an triail a athsceidealú ar dháta a chomhfhreagraíonn do mhí amháin i ndiaidh bhreith an linbh nuabheirthe;
- cead a thabhairt don iarrthóir an leanbh a bheith ar a brollach aici le linn na dtrialacha trí shos breise a thabhairt di nó trí shíneadh a chur leis an sos atá beartaithe, ag brath ar fhad na trialach.

Ní rachaidh bearta socrúcháin thar a bhfuil réasúnta; i bhfocail eile, níor cheart dóibh ualach díréireach a chur ar EPSO ó thaobh costais, ama nó iarrachta de. Go háirithe, níor cheart socruithe a

² Faoi mar atá sainithe in Airteagal 8(2) de Threoir 92/85/CEE

dhéanamh a sháródh leas institiúidí an Aontais Eorpaigh agus na n-iarrthóirí eile i leith dhul chun cinn agus chríochnú tráthúil an phróisis roghnúcháin.

Is é EPSO a chinnefidh méid an tsocraithe/na socrúithe réasúnta a dhéanfar, cás ar chás, ar dhóigh lánroghnach. Déanfaidh sé breithniú ar na srianta sonracha oibríochtúla ag céimeanna éagsúla sa phróiseas roghnúcháin.

Go háirithe an méid seo a leanas:

- Maidir le trialacha a riarann conraitheoir seachtrach EPSO go cianda agus a ndéanann sé feitheoireacht orthu (trialacha ilrogha ar ríomhaire, cás-staidéar, trialacha aistriúcháin nó aon triail eile), féadfaidh EPSO dátaí trialacha malartacha a thairiscint. Is féidir an triail athsceidealaithe a dhéanamh níos luaithe nó níos faide anonn ná an chéad dáta a roghnaigh an t-iarrthóir, má roghnaigh féin.

I gcás ina mbainfidh an iarraidh ar athsceidealú leis an gcéim dheireanach den phróiseas roghnúcháin, féadfar dátaí malartacha a thairiscint suas le dhá mhí i ndiaidh na tréimhse trialacha a sceidealadh i dtosach. Sna cásanna sin, féadfar an próiseas roghnúcháin a dhúnadh agus liosta na n-iarrthóirí ar éirigh leo a thiomsú sula ndéanfaidh an t-iarrthóir a d'iarr an socrú/na socrúithe na trialacha iarchurtha. I gcás ina n-éireoidh leis an iarrthóir a d'iarr an socrú/na socrúithe sa triail iarchurtha agus ina bhfaighidh sí marc deiridh atá coibhéseach leis an marc a fuair an t-iarrthóir deireanach ar éirigh léi dul ar an liosta a leagadh síos, nó níos airde ná é, cuirfear a hainm leis an liosta sin.

Mar sin féin, i gcás nach nglacfaidh iarrthóir leis na socrúithe a thairg EPSO faoin mbeartas reatha, nó nach mbeidh sí in ann na trialacha a dhéanamh ar an dáta nua a tairgeadh mar gheall ar bhac a bhain leis an toircheas céanna, le toircheas eile nó saoire mháithreachais, ní bheidh sí i dteideal aon socrú breise ar an bhforas sin, agus cuirfear deireadh lena rannpháirtíocht sa chomórtas.

Laistigh de na teorainneacha atá leagtha síos sa bheartas sin, déanfaidh EPSO gach iarracht na socrúithe réasúnta is iomchuí a chur ar fáil a bheidh in oiriúint do chúinsí sonracha an iarrthóra a rinne an t-iarratas. Féadfaidh EPSO an beartas sin a nuashonrú tráth ar bith agus forbairtí nua ina shamhail seachadta trialacha agus sa chreat rialála is infheidhme a chur san áireamh.

Dáta éifeachtach

Tiocfaidh an beartas nuashonraithe seo i bhfeidhm amhail ón 1 Lúnasa 2023

Tá an beartas seo gan dochar do bheartas EPSO maidir le freastal ar iarrthóirí atá faoi mhíchumas nó atá i riocht sláinte a fhágann go bhfuil coigeartuithe speisialta ag teastáil uathu chun na trialacha a dhéanamh. Tá tuilleadh eolais faoinár mbeartas comhdheseanna agus faoin nós imeachta maidir le coigeartuithe speisialta a iarraidh le fáil ar ár [leathanach gréasáin i dtaca le comhionannas deiseanna](#), sna Rialacha Ginearálta atá i gceangal le gach Fógra Comórtais agus atá comhtháite sa ghlaó ar léiriú spéise do bhall foirne ar conradh.

Chun tuilleadh eolais a fháil, déan teagmháil le EPSO-accessibility@ec.europa.eu